



## Komunikado di prensa nr. 2020-002

### Adaptashon di maneho monetario

WILLEMSTAD/PHILIPSBURG – En bista di e ekseso persistente di likides serka e bankonan i e tendensia di e reservanan ofisial ku a bin ta baha, medio ougùstùs di 2019 Banko Sentral a reanudá e findishinan di Certificate of Deposit (CD) ku ta tuma lugá kada dos siman. Sin embargo, despues di e di tres findishi e bankonan no a hasi uso di e findishinan kompletamente i debí na esei e ekseso di likides a baha ménos ku loke tabata deseá.<sup>1</sup>

Pa tòg apsorbé parti di e ekseso di likides di e bankonan (ku no a baha debí ku e findishinan di CD no a duna e resultado deseá), lo hisa e porsentahe di reserva obligatorio di 18,00% pa 19,00%, kuminsando ku e periodo di 17 di febrüari–15 di mart 2020. Esei lo baha e likides ku aproksimadamente NAf. 70 mion. Reserva obligatorio ta un instrumento ku ta pone ku e bankonan mester tene un porsentahe di nan depósitonan riba un kuenta blòkiá na Banko Sentral ku no ta paga interes. Komo resultado, no por usa e fondonan akí pa otorgá krédito riba merkado lokal ni depositá nan den eksterior.

Ademas, lo kuminsá apliká algun reforma di e reserva obligatorio ku durante di e mishon di asistensia tékniko di IMF na fin di 2019 riba tereno di instrumento di maneho monetario a wòrdu diskutí. Meta di e reformanan akí ta di oumentá efektivitat di e instrumento akí i na mes momento duna e bankonan mas fleksibilidat pa manehá nan likides. Den e próximo lunanan, lo elaborá den mas detaye kiko e reformanan lo enserá.

Lo reformá e findishinan di CD tambe a base di e rekomendashonnan di IMF. Entre otro lo kuminsá tene findishi semanal di CD ku plaso mas kòrtiku, esta, di dos siman. Banko Sentral lo indiká solamente e porsentahe di interes ku e ta dispuesto di paga, i e bankonan por inskribí si nan ta deseá. E CDnan akí ta bini na lugá di e CDnan aktual ku tin un plaso di kuater siman. E findishinan di CD di kada dos siman, ku plaso di 12, 26 i 52 siman, tambe lo sigui. Pa e findishinan akí, Banko Sentral ta fiha e suma total ku e ta deseá di apsorbé i e bankonan ta indiká pa ki suma, plaso i porsentahe di interes nan ta

---

<sup>1</sup> Ta midí e ekseso di likides di e bankonan a base di e ekseso di fondo depositá na Banko Sentral, esta, e fondonan ku ta mas ku loke ta nesesario pa atendé e transakshonnan diario i kompensá défisit temporal di likides. E eksesonan di fondo akí fásilmente por hiba na oumento drástiko di krédito otorgá i di depósito den eksterior. Tantu un oumento drástiko di krédito otorgá (loke ta trese kuné mas tantu gastu i importashon) komo depósito den eksterior ta okashoná bahada di divisa i p'esei por pone preshon riba e reservanan ofisial.

dispuesto di suskribí. A base di e interes ku e bankonan pidi, Banko Sentral ta skohe e ofertanan ku e lo aseptá. E reformanan di e findishinan di CD a drenta na vigor dia 31 di yanüari di 2020.

Willemstad, 3 di febrüari 2020

CENTRALE BANK VAN CURAÇAO EN SINT MAARTEN